

「國家社會科學基金重大項目」

何建明 主編

中國地方志
佛道教文獻匯纂

人物卷

(16)



國家圖書館出版社

【國家社會科學基金重大項目（11&ZD119）】

中國人民大學佛教與宗教學理論研究所

何建明 主編

中國地方志
佛道教文獻匯纂

人物卷

（16）



國家圖書館出版社

中國地方志佛道教文獻匯纂·人物卷
上海市

上海縣志

清·應寶時等修 俞樾 方宗誠纂

清同治十一年（一八七二）刻

光緒八年（一八八二）補刻本

僧道

宋

智儼居靜安寺某年七月十五日村設會寺僧畢赴惟儼在
有胥村人來寺請齋因同往舟行見捕鰕者從買一斗索水
噉之約以齋回還錢至齋家令席地一飯無襯錢漁者索錢
儼云還汝鰕復索水飲隨吐活鰕盈斗人始異之遂名鰕子

和尙將示寂斂蒲草爲繩萬餘懸諸廊廡曰吾將作大緣事
卽坐蛻人競施錢懸繩皆滿遂建佛閣今靜安寺猶稱鰕子
道場

希最字妙悟湖州施氏子出家受天台教於錢塘慧才緇流
畏而愛之號曰義虎治平中講經於青龍鎮隆平塔院尋居
勝果寺寺有鬼物爲祟希最爲之講說旋於空中得朱書數
十字自稱漢烈士沈光有自蒙讎解已生他化等語元祐庚
午季夏六日說法作偈而逝

據府志青志補
沈光碑見通志

妙普號性空自號桃花庵主漢州人久依死心禪師護證抵
華亭追船子遺風結廬書龍江上以鐵笛自娛建炎初徐明
叛道經烏鎮普荷策而往賊怒欲斬之普詞色不撓賊駭異
稽首謝過烏鎮得免紹興庚申書寄雪竇持禪師曰吾將水

葬矣壬戌持至見普尙存作偈朝之普亦說偈曰坐脫立亡
不若水葬一省燒柴二省開墻撒手便行不妨快暢誰是知
音船子和尙高風難繼百千年一曲漁歌少人唱遂乘木盆
由青龍江順流入海唱曰船子當年返故鄉沒蹤跡處妙難
量眞風寄徧知音者鐵笛橫吹作散場以笛擲空而沒後三
日見於沙上趺坐如生迎歸閣維舍利無數二鶴徘徊空際
火盡始去眾爲建塔於青龍據府志參
青志補
葉道士號猗蘭崑山人移居鶴沙每出游袖瓦石歸置竈突
中里人有異疾求之卽與一瓦石令歸亦置竈突中祝之病
卽愈人稱葉仙據南
志補

元

德林東甌人至正十三年居柘澤廢寺饑寒自若越歲仲夏

上海縣志

卷三十一

三

忽語人曰疇能施我一龕九月一日將此色身焚卻人未之信至期市新標自環趺坐台掌說偈曰二十七年學無爲信手拈來獲得渠一具幻身歸四大這番不受業風吹偈竟火自身起觀者皆下拜云

張仁義號一山元季黃冠有朱將軍者鎮海上陰蓄不軌未發聞仁義善符籙能致丁甲神乃命召將將軍袖出片紙焚於鑪頃之仁義呼曰神至矣速具紙筆以人手腕代之將軍出其手覆鑪上須臾手動筋縮已駭懼候執筆大書曰朱海賊而欲反耶赤而族毋妄動又曰而妻疾某達魯噶齊崇之亟齋薦可甦又曰而妾妊明年生子蓋三事皆將軍所問也最後云明日晚刻胡同知取汝首級可賄免未幾皆驗乃禮爲上客贈厚幣遣歸

壽寧字無爲號一菴靜安寺詩僧也採輯寺中赤烏碑陳朝
檜鰕子潭講經臺漚瀆壘湧泉亭蘆子渡並綠雲洞爲八詠
邀羣賢爲詩時有貢師泰成廷珪楊瑀王逢孫作顧或陸侗
又有鄭元祐遂昌人韓壁饒州人唐奎晉陽人馬弓會稽人
錢岳吳興人釋如蘭守仁皆富陽人趙觀澄江人余寅華亭
人張昱廬陵人錢維演錢塘人皆同輩唱和楊維禎爲序末
附明張紘詩則後所踵和也

明

原真字用藏俗姓朱得度於華亭興聖寺傳天台教洪武十
八年微疾索浴書偈曰四十二年無作無脩有生有滅大海
一漚真歸無歸心空淨遊趺坐而寂

如泰華亭人常乘一小舟四方參請洪武己亥四月至珍敬

庵微疾二十六日對眾自言初三日是我去期也眾來送我至期以所乘舟置於陸對佛說偈曰一枝紅焰起五色藕花香遂入舟自焚

紹宗字一原號遂初陳氏子年十三出家安國寺得法於靜菴鎮法師戒行精嚴洪武癸酉有事於廬山應召奏對稱旨賜金縷僧伽黎等服擢右講經陞右善世一日端坐而化敕遣中使致祭會者數千人其徒奉舍利遺骨建塔於安國寺無瑕福泉寺僧洪武間鑄一鐘撞之無聲海客至咸曰海中兩日鐘聲不絕無瑕悟曰此鐘魂也遂攝戒衣臨海灘宣咒頌誠眾僧撞三晝夜不歇鐘乃發聲而海中鐘聲忽絕無瑕曰鐘魂返矣乃歸

據南志補

福田庵頭陀蜀人也以其短髮蒙頭故名七歲入吳中卓錫

高昌鄉福田庵能前知得異人術吞盃無損雖大雪其所止處獨無王侍御圻舉甲子未報前數日頭陀每呼城隍土地可往賀未幾報捷者果至後無疾終旣茶毘心不化質色堅白

澄清和尚大將軍劉公岸子自幼從父駐師海上習武事後隨父兄大戰錢塘江上兄死難父航海知事勢已去乃入山爲僧得臨濟法嗣龍華法席

雲翁名慶法華寺中興祖也制行高潔寺鄰有陳大觀者與慶契寺有興築陳必助之將死函百金付慶曰本願及汝建大殿今無及矣然終當成之慶乃書其掌曰見我開口見我開手後三年至海濱知有大戶生一兒暗不語兩手不伸慶曰能助我成大願者我能愈之大戶出其兒卽前曳僧衣呼

師父大戶大喜詢其故遂捨貲獨建大殿殿成慶無疾跣逝

據法華鎮志補或云大戶卽費雄也
費雄事見寺觀法華禪寺曹垂璩託

善信號無疑嘉定吳氏子年二十九出家禮施水菴僧智德
爲師建文三年臘五十九示微疾乃索浴入龕火起自焚其
徒爲起塋繪像焉

朱蒲包者界浜沈氏僕也十八爲寶山募兵遇異人授藥一
丸服之腹中熱氣騰湧遂不覺寒暑飢渴衣破衲冒以蒲包
與之酒飲輒醉醉輒笑呼當街臥人呼爲蒲包仙行必挾竹
四竿夜宿則植竹於途不施苦蓋大雨無沾溼霜雪裂膚鼻
息齁如也市人釀酒敗朱挾竹攪甕輒變爲甘夏月裸坐赤
日中不浴而淨冬月河冰合以竹敲冰冰輒解裸坐水底有
兄弟不睦者微服訪之約爲方外兄弟朱瞠目良久曰自家

兄弟安在與別人作兄弟耶又問身壽幾何朱曰來日便是
去日抵家而沒或見其弄水輒雨遂神之患病者丐其蒲包
草煎服輒愈生平不爲人談禍福或無意吐一語必奇中後
無疾而化

拙猊和尚幼讀書通音律并善象緯岐黃之學長喜方外交
深禪理寄食江湖十餘年遇異僧輒老人乃祝髮皈依居龍
華寺忽一日有行僧詣其家報和尚已化去亟需千錢造龕
其家往唁見和尚面壁獨坐合掌說重生偈曰去得乾淨去
得乾淨莫負山僧忙報信懸崖撒手踏虛空那有人我塵緣
些子賸來得好來得好前日是前生今日是今生大地一輪
紅日曉和尚們吃飯飽休論閑是閑非卻把光陰錯過了瞬
目而逝

山海一號妙真相傳竇遠伯李如松子也時邊疆多事如松以恃勇奮身失律奪爵家被籍山海竄逸焉祝髮海上往來江淮間頗知內典先是從父塞上夜半羣鴈突起山海曰必有驚之者鴈飛不百里況夜乎伏兵必在近遂率騎尋蹤果得之殺賊無算其知兵類如此

前志云右據郭開泰味諫軒詩稿今考明史李如松傳如

松以萬歷二十六年擢土蠻戰死以其弟如梅代為總兵官

授長子世忠錦衣衛指揮使世襲世忠未久卒弟顯忠由廕歷遼

東副總兵當嗣爵朝臣方惡李氏無為言者崇禎時以顯宗

子尊祖嗣爵遠伯據此則如松無奪爵被籍事然開泰親與

山海訂交贈以詩有昔志登麟閣今游過虎溪賜衣常納補

又似不妄者姑錄識於此

朱道人名松唐行人初不識字嘉靖倭亂後冥修默坐有童

子報以示寂之期郡人周恩兼夏時往問輪迴道人曰刳外

修行方免得不輪迴一性昏迷萬事差遂舉火示寂

府志參
湘故述

國朝

智函字雪笈住西林懺院通佛典書法二王有跋喬將軍詩冊墨蹟藏顧培豫家詩名徧海上所著見藝文後又有西林僧湛霽亦能詩

興徹號犀照宏覺老人高弟也俗姓劉江右甲族襁褓中卽不茹葷喜趺坐度江州能仁寺爲僧遭跌豁悟著語錄游海上駐錫鐸菴書法瘦削清峭詩有晶溪集人謂其從光明藏中流出洵然後還山作偈曰我從無生來還向無生去去來相亦無豈向無生住投筆坐化

普澤號曇潤居鐸菴書宗東晉書法宋元及談禪意旨微遠有支遁風時以爲書畫禪云

顧源本川沙人俗稱顧爛頭海濱有捕魚者網得石匣堅不

可啟以遺願匣卽開獲異書盡解其秘遂神於術會大旱祈
雨無應有以源本白令令飭役傳喚辭不往役強之隱取瓦
石固封以復令啟視怒擲諸地雷聲轟然令始具束以禮招
之源本至祈畢約三日雨至期果如約歿後大風雨失異書
及柩所在

據府志
南志補

陳和尚周浦太平菴僧徒跣乞衣食輒分與飢寒者順治間
嘗取鑪灰給病者調服輒愈已而灰不給撮座間土與之亦
愈旬日座間土陷成井遂汲井泉應之亦驗巡撫土國寶慮
其惑眾檄縣遷之崇明復遷蘇之北寺求者益眾與之談皆
尋常語或問鑪灰泉土能愈疾之故則曰和尚不知人信之
卽與之耳十年自夏至冬亢旱里人請濬周浦塘和尚乃募
銀一千餘兩獨開茅柴港九百餘丈事載王鑄濬周浦塘碑

記

趙道人居一團初業耕漁不識字然狷介不苟取敦孝友重然諾年三十餘會鼎革薙髮如頭陀就居旁編草爲棚飲食其中或終日不舉火問其故不言勸之出亦不應康熙初遠近造謁者但以箸畫水爲字答之言有奇驗駐防副將周徒步訪之不語饋之不受年至七十餘

清徹字慧白新場倪氏子出家青蓮菴

菴在上嘉接界後遷嘉定

遇俗節

私祀其先父爲諸生祖爲孝廉外祖亦某科進士清徹每五更擊鐘鐘罷村人候以出耕自知壽六十二先一歲除夕夢觀音手示墨字語人曰墨之爲字甲又加二僧家火化心者火也化則歸土病革語其徒曰吾當茶毘無堪舉焰須吾自爲之乃炷香於紙帛而瞑旣斂置香帛於棺上帛燼而棺亦

焚徒德圓字上林本邑人俗姓薛戒行如其師臨寂偈曰歸
去來兮無障礙綠水青山常不壞西方只在白雲端蓮臺銷
隕虛空碎德崇字峻巖亦師事清徹能詩據紫隄村志補

本瀛號神山徐氏子父仲雍母金氏兄弟四人次天竺神山
其季也少孤隨天竺薙度於簪菴和尚參請宏覺大師於天
童居吳江之疏溪草庵數年兩兄之在家者相繼沒迎母菴
居製僧帽鬻之以供朝夕母亦清脩淨業先知去期誦佛而
化時天竺已出世開法師益自激厲再謁天童聞雷有省後
主講湖之道場山天竺亦開法於杭州之南澗鎮江之夾山
二三百里利竿相望激揚宗旨更唱迭酬諸方咸嘆羨焉康
熙甲戌春同天竺歸上海省墓天竺告寂師謂人天和尙旣
去地和尙且繼之八月中示微疾吉祥而逝世壽六十八僧